

時疫解惑論

全卷

時疫解惑論

蔡元培題



千頃堂書局標



時疫解惑論自序

本年時疫流行此傳彼染死者甚衆察其病狀皆為上吐下利
心慌轉筋音啞肉脫四肢冰冷兩脉伏匿大小同病萬人一轍
揆其受病之人多係饑飽勞役烟酒聲色之徒蓋疫癘之毒每
乘人氣之虛內襲為病經曰邪之所湊其氣必虛是也邇來疫
毒傳染遍及城鄉其證勢之梟惡不可逆料其患病之天殤不
可勝數七八月間成都大疫病者如林凡乞治者不能盡診叩
其證狀錄方授之互相傳送活人無算爰將治驗之方詳訂藥
品分兩擬名庚申解疫飲方中首以石膏為主投之百發百中
復治時疫重病曾有用石膏至十餘觔之多而始愈者惟獨吹
無和反為醫界諸公所謗譏嗚呼洪鐘毀棄瓦釜雷鳴其借此
術以漁利者匪伊朝夕矣世之言醫者抑何夥耶淺者售偽者

售圓滑者售率以人之生命為嘗試若醉若狂若昏若迷苟聞時疫之名即目眩心惑是寒是熱漫無的見僉指肢冷肉脫為陰寒直中微陽欲亡之的據凡附子肉桂乾薑丁香砂仁胡椒茱萸蒼朮生薑藿香等種種燥熱之藥隨意亂寫藥一下咽死如服毒猶以服熱藥而肢更冷肉更脫其為大寒大虛無疑逞其無師之智揚其道聽之說病理蕩然治法陵夷舉世皇皇莫不以補虛回陽之方交相告勉一醫如斯百醫效尤醫者無目病者無命在都市之區則填溢街巷在窮僻之鄉則委壑投崖所以人之有生為水火刀兵所傷殘不若瘟疫之廣盜賊匪徒之凶暴不若庸醫之毒醫以不明之術傳之於子傳之於徒衣鉢相承陷人於死而終不悟其所以然豈真天生若輩而為天代行劫運者哉幸復尚存一隙微明治時行瘟疫無論老幼男

婦一以石膏為主特撰此論擬為標的藉以解破舉世之大惑
嗟夫復殫精竭力不避毀謗而諄諄以涼藥立論者非但欲以
美於已而非於人矜於已而苟於利也所冀醫者之惑易解而
病者之命得延耳論中義理有乘失者幸冀來哲以改正焉務
欲闡明時疫治法而普救病者之生命云爾時民國九年歲次
庚申九月望日華陽劉復題於後石軒

時疫解惑論目錄

自序

上卷

總論附庚申解疫飲方

論吐利

論轉筋

論心慌

論疫脈

論洩瀉

論肢厥

論脫肉

論姪娠染疫

論小兒染疫

論善後

下卷

小引

條例 四十六條

附神效白痧藥方

附紫雪丹方

附錫類散方

結論

答客難大意 七條

陳西庚先生校言

時疫解惑論上卷

蜀華陽劉復民叔甫著

總論

兵兇之際。疫癘盛行。自古然矣。况茲值暑濕交蒸之夏月乎。人在暑濕交蒸之中。無隙可避。其不能淡泊滋味。屏逐聲色者。則交蒸之毒。逕由口鼻襲入。分佈肺胃各經。證呈梟惡。醫易眩惑。多有病西藥東。隔靴搔癢。坐誤時刻。死亡接踵者。揆其致死之由。而醫家病家兩不之知也。緣時疫癘氣傳變異常。不但固執古方者。不可以治今病。即本月之方。或不宜於後月。奈何醫者昧其變通。施治之旨。而世更立怪誕不經之名。如世所謂鯽魚痧。烏龜痧。蝦蟆痧。長蛇痧。以及吊脚瘟。黑痧。瘟水。瘟火。瘟種種。駭人聽聞之名。附以不經之方。詳為刊印。遍貼街衢。世人遵用。

漫無應驗。不責方治之不良。而曰刼運使然。豈不謬哉。復目擊
心傷。特詳論之。夫疫者何。暑濕交蒸。穢濁之腐氣也。故長夏之
季。為流行傳染最盛之時。蓋雨暘無常。寒暖易變。方其盛暑。熱
蒸炎赫。沸騰。戩而寒霧凝慘。雨淫濕鬱。陰霾初散。烈日復臨。天
之熱氣下地。之濕氣上交。結互蒸釀。成穢濁。兼值兵燹之際。積
屍載道。血腥之氣。溷於塵沙。其腐臭穢惡。挾暑濕以蒸騰。上下
相摩。氤氳鼓蕩。如烟如瘴。如潮如霧。其來也無端。其出也無時。
假風流行。分布四野。凡征途將士。田野耕夫。以及勞工苦力。奔
走於氣交之中者。莫不吸此穢濁惡毒。盡入即病。因病致死。病
氣屍氣充塞一室。連牀並榻。互相傳染。沿門闔境。相繼死亡。殆
張平子所謂民病都死。死有滅戶。人人恐懼者耶。抑陳思王所
謂腐氣流行。闔門而殪。覆族而喪者耶。用意太佳。於今再見。嗚

呼慘矣。嘗察吸入疫毒二路有二。口鼻是也。由口入者歸於胃。由鼻入者歸於肺。歸胃則上吐下利。形消肉脫。歸肺則惡寒發熱昏悶音啞一臟一腑同受疫毒表證裡證各呈其象。在胃則曰霍亂。霍亂轉筋者危。胃液內涸風邪鴉張也。在肺則曰痧脹。痧脹閉鬱者殆。肺氣壅塞穢毒盤踞也。然霍亂痧脹往往並見。惟肺氣實則邪多歸併於胃。胃氣實則邪多歸併於肺耳。夫肺司呼吸邪在肺者宣其氣。胃司飲食邪在胃者利其水。宣氣利水是治時疫兩大法門。當知時疫為病雖有肺胃之殊一皆熱毒為患。絕無溫散溫補之例。蓋暑即火也。火勝則風發穢即毒也。毒鬱則火熾。毒火燔灼津液有立涸之勢。再服辛熱如桂附薑黃及羌獨芎防之屬。是抱薪救火死不終朝矣。故宣氣宜辛涼利水宜淡滲。氣宣則衣證退。水利則吐瀉平。復千慮而得此。

義不敢私秘。特將自信之理。撰為解惑之論。大法以庚申解疫。飲為主方。方中推重石膏。蓋疫為火熱之毒。石膏俱寒水之性。以寒勝熱。以水制火。故以之治時行瘟疫。全活者不勝屈指。今欲矯正醫誤。而壽民生。敢辭饒舌乎。然復也不學無文。義陋理粗。固弗足以啟淪來學之性靈。而鍼世矻俗。應時救弊之苦衷。幸得有以大白於天下而已。謹論。

附庚申解疫飲方。專治上吐下利。心慌轉筋。身冷肉脫。兩脉沉伏。音啞。口渴等診。

生石膏

二兩

滑石

一兩

生扁豆

八錢

木瓜

三錢

銀花

四錢

茯苓

苓三錢

猪苓三錢

蘭葉三錢

澤瀉三錢

葱白二錢

水煎

涼服

或微溫服。並刺尺澤。委中。少商。厲兌等穴。以洩疫毒。

按右方辛涼淡滲。極為對證。若不口渴。心慌。勉者。乃通常

寒濕吐利之證而非時行疫病也。宜用扶陽驅溼之溫藥治之。本方切勿輕服。苟認證不的。用藥一誤。死生反掌。市醫不知證有疑似。敢將治愈寒濕吐利之方。妄治時疫熱毒之病。竟有登諸報章以表揚者。或刊印廣告以張貼者。時疫服之無不斃命。噫。好仁不好學。其流弊可勝道哉。茲將時疫各證分別詳論於後。

論吐利

本年為少陽司天。厥陰在泉之歲。素問五常政大論曰。少陽司天。火氣下臨。風行於地。塵沙飛揚。中鬲不通。其主暴速。細繹經旨。適於大易風自火出之義。同蓋燔灼之威。動則風生。釀疫之由。抑既詳於總論矣。夫吐利之暴發也。緣暑濕交蒸之毒。踞於腸胃之間。濕從火化。火動風生。水液受火風之鼓蕩。宛如海水。

之波濤澎湃。湧於上則嘔。注於下則利。以致中脘不通。三焦不用。水道失司。決瀆反常。故吐利一發。勢極暴速。常有滴藥未服。而即告斃者。治之之法。惟以沉靜之藥。制其迅烈之勢。俾火滅風熄。則吐利自止矣。故治時疫吐利。首推石膏為主。以其具沉寒之性。能制炎上之火。而鎮風陽之動也。若妄用熱藥。則火益熾。風益煽矣。客有感者。而問於余曰。方書皆謂吐利之證。多因寒犯脾胃。故內寒者十居八九。內熱者十難一二。寒涼之藥。不宜妄用。先哲格言。昭昭可考。而君治吐利之疫。獨重石膏。毋乃太偏乎。復答曰。子何不察之甚也。因寒致吐者。必澄清。時疫之吐。多酸濁。此吐雖同。而酸濁獨異也。試觀夏月羹湯。過夜則酸。豈非酸味屬熱之明驗乎。素問至真要大論曰。澄澈清冷。皆屬於寒。又曰。諸嘔吐酸。皆屬於熱。此寒熱嘔吐之辨。最為明瞭。故

吐有寒證。吐酸則必無寒證也。復凡診時疫之吐無不酸者。甚則內熱上衝。飲入胃中。不待蒸為酸濁。而暴湧直吐者。素問至真要大論所謂諸逆上衝皆屬於火是也。再論泄利寒熱之辨法。其因寒致利者必清穀。時疫之利必臭穢。此泄利雖同。而臭穢獨異也。故靈樞師傳篇曰。腸中熱則出如黃糜。腸中寒則腸鳴飧泄。飧泄者澄澈清冷。完穀不化之謂也。復凡診治時疫泄利。無不臭穢如黃糜。甚則火風鼓蕩。腸中水液不待蒸為垢污。而暴注直泄者。素問至真要大論所謂暴注下迫皆屬於熱是也。由是觀之。吐利之發。因乎火風之動。苟非沉寒大劑。何能止其吐利耶。夫吐利不止。是門戶不要。津液不存。是倉廩不藏。其人未有不自焚而死者也。復製庚申解疫飲之。重用石膏。是沉寒以制火風之動。復用滑石。乃淡滲以通水道之壅。火風熄則

水道通而吐利止矣。此方屢試屢驗。明者察之。若援引治澄澈清冷之熱藥。施於時行瘟疫之吐利。未有不殺人者也。雖然辨吐利之寒熱亦難矣哉。

論轉筋

轉筋一證。昔人皆指為寒。惟劉河間獨知為熱。張戴人獨知為風。其所辨論甚精。河間原病式曰。轉反戾也。熱氣燥燥於筋。則攣瘃而痛。火主燔灼燥動故也。或以為寒客於筋者。誤也。蓋寒雖主於收引。然止為厥逆禁固。屈伸不便。安得為轉也。所謂轉者。動也。陽動陰靜。熱證明矣。夫轉筋者。多由熱甚。霍亂吐瀉所致。以脾胃土衰。則肝木自甚。而熱燥於筋。故筋轉也。夫發渴則為熱。凡霍亂轉筋而不渴者。未之有也。戴人儒門事親曰。轉筋者。風主肝。肝主筋。風急甚。故筋轉也。內經謂風以動之。是已。戴

人主風河間主火兩公所論深知卓識先得我心之同惟火動風生之理尚引而未發茲續論之夫胃者倉廩之官也為氣血生化之原凡臟腑筋骨賴以榮養故素問痿論曰陽明者五臟六腑之海主潤宗筋宗筋主束骨而利機關也夫陽明者胃也胃中津液因吐利而內涸宗筋失潤亢陽化風况肝主筋為風木之臟外風內風互為煽動火隨風轉竄爍於筋故攣瘳而轉痛也甚則牽縮陰丸痛迫小腹或周身之筋盡皆轉動素問疏五過論曰四肢轉筋死日有期洵危候也知轉筋為火風竄爍之證則必用熄風之藥雖石膏沉寒足以清火鎮動若轉甚者尤必佐以桑枝羚羊膽草梨汁藕汁蔗漿之屬始克奏效所謂風淫於內治以甘寒也若泥守方書專恃木瓜一味則債事多矣客有感者而問於余曰君治轉筋以石膏清火鎮動復以羚